

# Ruaus cun accidents

La zona da ruaus per selvaschina sut la Muota da Falera secumprova

DAD AUGUSTIN BEELI / ANR

■ **Denter Falera, Laax, Sagogn e Schluein schai igl uaul da Gonda sco in trianghel stgirverd denter ils quater vitgs. Trutgs e sendas ein frequentai stedi dalla primavera tochen igl atun. Igl unviern ei la zona reservada alla selvaschina. E quei fa effect.** Igl uaul da Gonda sut Falera cunfina encunter sid cul stradun digl Alpsu. Denter Laax e Schluein schabegiavan tochen ils 2012 trasora accidents cun selvaschina. Dapi ch'igl access egl uaul da Gonda ei scumandaus igl unviern ei quei semidau cumplet. Igl Uffeci cantunal da catscha e pesca conferma ch'ils accidents stradals sin quei tschancun seigien sereudici massiv dapi che la zona da ruaus seigi en vigur. Dapi treis quater onns sereudeschian ils cass da selvaschina spuentada che cuora sin via ed avon ils autos. Sil tschancun denter Laax e Schluein eis ei vegniu pli ruasseivel. Il traffic ei buca sereudici. Sin quei ischel principal dalla Surselva dumbran ins aunc adina varga 10 000 autos a gi. La via cunfina el nord cuagl uaul da Gonda. Il territori sut la Muota da Falera ei habitadi d'unviern per tscharvas e cavreuls. Avon ils 2013 vegneva *Gieri Derungs*, il guardiaselvaschina ch'ei responsabels per quei territori, clamaus quasi mintga gi zanua sin quei tschancun denter Laax e Schluein. Beinqual automobilist che carrava senza studegiar vid selvaschina ha stuiu frenar anetg il viadi.

## Daco buca gia dar liber ils 20 da mars?

Accidents spectaculars cun tauris tscharva a mesa via han dau bia da discutir ella region. Dapi ch'il niev concept ei en vigur ei la situaziun semidada. Pilpli spuentavan spassegiaders las tscharvas ni ils cavreuls ord lur habitadi. Il guardiaselvaschina conferma ch'il concept secumprova e che quel ha gidau da sligar il problem. Sco *Derungs* declara ha el tschentau si il december gia la quarta gada en diesch loghens entuorn la zona las tablas d'informaziun. Las sendas da viandar vegnan serradas cun pals e cordas che rendan attent al scamond d'access. Tochen il december 2012 havevan tuttas quater radunonzas communalas da Fale-



Ina dallas 10 tablas entuorn la zona da ruaus: Cheu a Runcal sur Schluein renda quella signalisaziun attent al scamond d'access. FOTO A. BEELI

ra, Laax, Sagogn e Schluein approbau il concept niev dalla zona da ruaus per selvaschina. Quella fuva en vigur dapi il 2004, mintga vischnaunca haveva denton auters temps ch'il scamond valeva. Egl uaul reveva in malruaus cuntinuau pervia da spassegiaders, joggers, glicud cun tgauns.

Dapi ils 2013 ei igl access egl uaul da Gonda reglaus claramein per tuttas vischnauncas tuttina. Mintg'on naven dils 20 da december tochen ils 30 d'avrel astg'ins buca ir en quei territori. Suentar quater onns trai il guardiaselvaschina *Gieri Derungs* lu era ina bilantscha ordvart positiva. Per l'ina eis el buca pli vegnius clamaus tier accidents sil stradun digl Alpsu, per l'autra ha el era buca udiu resuns negativs ni reclamaziuns pervia dil scamond d'access. La populaziun pudess selamentar oravontut ch'il scamond cuoza tochen ils 30 d'avrel e buca mo tochen ils 20 da mars. *Derungs* declara daco: «Il studi *Arnold* ha cumprovau ch'ils 31 da mars ei per la selvaschina il datum pli flei-

vel e ch'ils animals drovan lu il ruaus per regenerar e midar sil pavel da stad.» El manegia il studi *Walter Arnold*, professor agl institut per scienza dalla selvaschina ed ecologia all'Universitad da Vienna. Las lavurs da perscrutaziun che quel ha fatg en connex cul paus d'unviern e la regeneraziun dalla selvaschina ein d'impurtonza internaziunala.

## Dameins disturbis, dameins fom

Dalla populaziun ha *Derungs* buca udiu reclamaziuns ch'il scamond cuozi tochen ils 30 d'avrel. Sco el gi respectan ins era generalme in la restricziun. La conclusiun dalla zona da ruaus egl uaul da Gonda ei era interessanta pil forestal-esser. Damai che la selvaschina drovi en ina tala zona – nua ch'ella vegn buca pli disturbada e scatschada – in toc dameins energia, secuntenti e drovi ella era dameins pavel. Aschia sereudeschien ils donns vid la bostga. Quei fatg conferma perinagada ils biologs da selvaschina.

Ella Foppa detti ei bein aunc loghens nua ch'ils animals vegnien tratgs magicamein encunter praus semnai igl atun nua ch'ei verdeggi, afferma il guardiaselvaschina. Per contonscher quels loghens ston els traversar vias. Era duront ils dus davos unviarns migeivels ei quei stau il cass. En tals loghens serimnan gronds trieps da tscharvas. Sco magnets vegnan els tratgs, la vacca tscharva meina siu vadi sils trutgs tradiziunals, aschia dattan ellas vinavon las disas da generaziun tier generaziun. Silmeins eis ei gartegiau da rumper empau il secuntener grazia a discuors persunals culs purs. Aschia para il problem cul pavel da silo dad esser sut controlla. Sch'ei dat era ils proxims onns buca pli accidents da selvaschina sut igl uaul da Gonda grazia alla zona da ruaus vegn a semussar. Sch'ils unviarns cun pauca neiv han forsia era giu lur influenza sil secuntener da tscharvas e cavreuls el contuorn dil stradun digl Alpsu denter Laax e Schluein ei aunc buca perscrutau.

## MUSTER

### Secunda notg da guggas el center da sport e cultura

(anr) Sonda proxima, ils 28 da schaner 2017 ha la secunda «GuggaNight» liug el center da sport e cultura a Mustér. Ella vegn organisada da Las Bagordas. Era quella ga eis ei reussiu als organisaturs da carmalar interessantas musicas da tscheiver da differentas parts dalla Svizra e dalla Tiaratudestga a Mustér. Aschia astgan ils aspectaturs selegrar sin ina varionta sera cun tuns tscheivrls per exempel da «Sauknapp» da Herisau ni dils «Städer Schränzer» dad Alpnach. En tut seprentan nov musicas cun rodund 350 musicantas e musicants sin tribuna ella halla dil center da sport e cultura. Suentar ils resuns positivs dalla davosa «Gugga-Night» quantan ils organisaturs era quella gada cun in grond diember d'aspectaturs. Sper ils concerts e la fiasta el center da sport e cultura vegnan las guggas hospitontas a delectar duront l'entira fin d'jamma ils visitaders dil territori da skis da Mustér.

### Presentaziun da lavurs da matura al gimnasi a Mustér

■ (anr/hh) Quest venderdis, ils 27 da schaner 2017 presentan studentas e students dalla sisavla classa dil gimnasi dalla claustra da Mustér lur lavurs da matura. Ei setracta dallas lavurs che han obteniu in predicat bien ni fetg bien. Las lavurs vegnan presentadas naven dallas 19.45 ell'aula sco era ellas stanzas 202, 203, 206 ni el Cinema. En tut setracta ei dad otg lavurs. En quellas ein gimnasiastas e gimnasiasts da Mustér sefatschentai dalla musica ni era digl art sco era da temas dalla natira. Aschia sefatschenta ina lavur dils aviuils. In'otra lavur pertucca la punt da Versell a Danis-Tavana ed in'otra las medias socialas. Lu ha in student era tematisau l'inscenzaziun d'Adolf Hitler ed in auter l'impurtonza dalla formaziun pil svilup d'ina tiara, concretamein davart Haiti. Quella lavur davart la formaziun vegn completada cun in film. La presentaziun dallas lavurs cuoza mintgama denter diesch e quendisch minutas. Silsuentar vegn dau la caschun da tschentiar damondas, respectivamein da midar stanza.

## Turnier da troccas Sagogn – ils resultats

■ (anr/abc) Al турниr da troccas da vanderdis vargau ein 40 giugadurs e giugadurs separticipai. Sco quei ch'il president dall'unioni Pro Sagogn, *Alois Poltéra*, communichescha ei l'occurranza puspè stada in grond success. Danovamein eis ei stau igl emprer турниr suenter il campiunadi grischun. Era sch'ils dus campiuns dil турниr cantunal, *David Tuor* e *Lothar Cajacob*, han muncanu, han ils organisaturs *Johann Cantieni* e *Renata Cathomas* astgau solidar il president dall'Unioni grischuna da troccas, *Andreas Muoth*. Ils

varga 40 participonts ein sesenti bein ed han gudiu in'emperneivla sera denter trochistas e trochists. Da Turitg tochen Mustér ein ils participonts vegni ell'aula dalla casa da scola nova a Sagogn. Igl ei stau l'emprema gada ch'il турниr ha giu liug ell'aula. Quei liug seigi secumprovau fetg bein, han ils organisaturs confirmau.

Igl onn proxim ha il турниr cantunal liug a Schluein, el vitg vischinont da Sagogn. Forsa vegn l'unioni Pro Sagogn era ad organisar en zacons onns la sentupada centrala dallas trochistas e dils trochists. Il

victur dil турниr da Sagogn *Daniel Vincenz* da Vella ha astgau ir a casa cun bials schenghetgs, ordavon in diplom che *Renata Cathomas* ha sponsurau. Ei setracta d'ina grafica decorativa dall'artista *Yvonne Gienal* che muossa las quater colurs dallas troccas. Il secund-meglier, *Claudio Camathias*, ed il tierz, *Josef Cadruvi*, han retschiert in medem diplom, denton ellas colurs dallas medaglias, argien e bronz. L'unioni organisonta ha sponsurau premis per tuts participonts en fuorma da meila tosta, must e mèl d'aviuils da Sagogn.



Ils victurs dil турниr da Sagogn cullas «medaglias» en fuorma da grafica dall'artista *Yvonne Gienal*.

FOTO A. POLTÉRA

reclama



«Ich bin für die Steuerreform, weil die Schweiz damit ein attraktiver Wirtschaftsstandort bleibt.»

Hans Hess  
Präsident Swissem

www.standort-staerken.ch

